

---

---

## ԵՐԱԶԳԱՎՈՐՄԻ 1977 Թ. ՊԵՂՈՒՄՆԵՐԸ

### ՍԵՐԳԵՅ ՀԱՐՈՒԹՅՈՒՆՅԱՆ

Երազգավորս գյուղը գտնվում է Ախուրյան գետի աջ ափին՝ պատմական Երազգավորս բերդ-ավանից մոտ 2 կմ հյուսիս (այժմ՝ Թուրքիայի տարածքում): Վերջինս դեռևս IX դ. 80-ականներին դարձավ Բագրատունիների արքայական նստավայրը: Բագրատունի առաջին թագավորները Երազգավորսում կառուցել են պալատներ, եկեղեցիներ, պաշտպանական կառույցներ: Դրանցից Մաբատ թագավորի կառուցած կաթողիկեն լավ պահպանվել էր մինչև նախորդ դարի կեսերը (50-ականներին պայթեցվել է):

Երազգավորս գյուղում (նախկին Արալըղ) 1977 թ. պեղումներով հայտնաբերվել են VII դարին պատկանող խաչաձև հատակագծով եկեղեցու ավերակներ, բնակարանային, արտադրական և այլ շինություններ: Եկեղեցին յուրօրինակ էր իր հյուսիսարևելքում կառուցված երկարավուն ու նեղ ավանդատնով: Մանրագին ուսումնասիրությունները ցույց տվեցին, որ այն կառուցվել է եկեղեցու հետ միաժամանակ: Բ դեպ, նմանօրինակ հուշարձան ուսումնասիրվել է Շիրակի մարզի Մայիսյան գյուղում (Օրթաքիլիսա), գրեթե նույն տարածքում՝ հուշարձանից 10 կմ հյուսիս, որից կարելի է եզրակացնել, որ նման կառույցները հատկանշական են Շիրակի համար: Եկեղեցու քիվը զարդարված է եղել շքեղ քանդակով:

Հայտնաբերվեցին նաև արաբական արշավանքների ընթացքում կատարված դաժանությունների ապացույցներ՝ մի քանի թոնիրներ, որտեղ վառել են տեղաբնիկներին: Բացվեցին համաժամանակյա ճարտարապետական կոթողի մանրամասներ՝ եռաստիճան հենապատերով պատվանդան, քարե դագաղներ և այլն:

Պեղումների կարևոր արդյունքներից է X դ. բազմահարկ ամրոցի ավերակների հայտնաբերումը: Պարզվում է, որ Անին մայրաքաղաք դառնալուց հետո շրջապատվում է ամրոցների խիտ ցանցով, որոնց հեռավորությունը մեկը մյուսից Երազգավորսի հատվածում 3.5 կմ է: Երազգավորսը Տիգրիսի<sup>1</sup>, Ախուրիկի և այլ բերդերի հետ Անի մայրաքաղաքի մատույցները պաշտպանել է հյուսիսից: Ամրոցը վերջնականապես կործանվել է XIII դ.: Սակայն կյանքն այստեղ շարունակվել է նաև հետագա դարերում: Այդ են վկայում հայտնաբերված ձիթհանը, արտադրական այլ կառույցներն ու կենցաղային առարկաները:

---

<sup>1</sup> Թորոս Թորամանյանը, խոսելով Շիրակյան մայրաքաղաքի ու դրանից ընդամենը 2.5 կմ հեռավորության վրա գտնվող Տիգրիս բերդի մասին, գտնում է, որ այն պետք է ունենար ապարանք, որը տեղադրված է եղել նշված բնակավայրի բարձրադիր մասում, հավանաբար, Երազգավորս մայրաքաղաքի պաշտպանության համար (տե՛ս Թ. Թորամանյան, Նյութեր հայկական ճարտարապետության պատմության, Երևան, 1942, էջ 312–314, 1948, էջ 114–119):

Պարզվում է, որ Անի մայրաքաղաքն ունեցել է պաշտպանական մի քանի օղակներ, որոնցից մեր կողմից ուսումնասիրվել են առայժմ երկուսը՝ Անիի միջին և մոտակա պաշտպանական համակարգերը<sup>2</sup>:

Հետաքրքիր է այն փաստը, որ դեռ վաղ միջնադարում նույնպես հարկ էին համարում երկիրը պատել հուսայի բերդերով: Հայտնի է Մուշեղ Մամիկոնյանի ծրագիրը՝ Հայաստանը ռազմական ճամբարի վերածելու, երկիրը բերդերի ու ամրոցների խիտ ցանցով պատելու մասին: Պատմական դեպքերի բերումով այդ գաղափարն իրագործվեց Բագրատունիների տիրապետության օրոք:

Ինչ վերաբերում է պեղումների ժամանակ բացված Արալըղ - Երազգավորսին, ապա այն իր ուրույն տեղն ունի VII դ. ճարտարապետական կառույցների շարքում: Հայտնի է, որ Շիրակավանից առաջ, կարճ ժամանակով, Բագարանը դարձավ մայրաքաղաք: Հարցն այն է, որ մեր պեղած Երազգավորս - Արալըղից մոտ 3 կմ հեռավորության վրա դեպի արևմուտք գտնվում է Տիգնիս բերդը: Մոտավորապես նույն հեռավորության վրա, սակայն հարավ-արևմտյան կողմում՝ Շիրակավան - Երազգավորս մայրաքաղաքն է, մի քանի կիլոմետր հյուսիս՝ Կալա-իչի բարձունքի բարձրադիր մասում՝ Հոռոմի պաշտպանական համակարգն է: Բնակավայրերի և բերդերի այսպիսի տեղադրման մասին տարբեր կարծիքներ են հայտնվել: Մի բան հաստատ էր, որ յուրաքանչյուր նման բերդ կամ ամրոց, ինչպես իր ժամանակին, այնպես էլ հետագա դարերում մի քանի նպատակի է ծառայել:

1. յուրաքանչյուր ամրոց պաշտպանական ինքնաբավ միավոր է,

2. կատարել է առաջապահ ամրոցի դեր՝ մտնելով մոտակա ամրոցների պաշտպանական համակարգի մեջ,

3. ժամանակի առաջադրած խնդիրներին համապատասխան (տվյալ դեպքում Շիրակավանի, հետագայում նաև Անի մայրաքաղաքի համար)՝ տարբեր նշանակություն է ունեցել: Անին մայրաքաղաք դառնալուց հետո վերոհիշյալ մայրաքաղաքը մի կողմից դարձել է Մարմաշենի պաշտպանական համակարգի, մյուս կողմից Անիի առաջապահ ամրոց: Պետք է նշել, որ Հայկական լեռնաշխարհում տարբեր ժամանակներում առաջացած պետական միավորներից շատերը նման պաշտպանական, տնտեսական և այլ նպատակների են ծառայել:

Երազգավորսում պեղումների միջոցով բացված եկեղեցին ունի կենտրոնական կամ գլխավոր խորան, որի բեմը հավասար է եկեղեցու մնացած տարածքի հարթությանը: Ինչպես դրսից, այնպես էլ ներսից ունի խաչաձև հատակագիծ: Հյուսիսարևելյան կողմում կա նաև ավանդատուն (հավանաբար, այս ժամանակներից է սկսվում լրացուցիչ սենյակի կառուցումը հոգևորականների հանդերձավորման և այլ պահանջների բավարարման համար): Պեղումներով հայտնաբերվել են դամբարաններ, որոնք առկա են ինչպես եկեղեցու ներսում, այնպես էլ անմիջապես սրան կից:

Իհակիզված դամբարան: Գտնվում է VII դ. եկեղեցու երկու (գլխավոր և հյուսիսարևելյան) խորանների միջև, ուղղվածությունը հյուսիս-արևելք, հարավ-արևմուտք: Մակարդակը գրեթե հավասար է գլխավոր խորանին:

<sup>2</sup> Ս. Հ ա ռ ո թ յ ո ն յ ա ն. Անբերդ, Երևան, 1978, էջ 34-50:

*Մյուս դամբարանը զուտ քրիստոնեական թաղում է, սալարկղ՝ փորված սև փափուկ տուֆի մեջ՝ մոտ 1 մ խորությամբ, վրան նույն քարից կափարիչով ծածկված:*

*Տիգրանի կամ Տգնիս բերդի մասին Ալիշանը բերում է Հ. Ներսես Մարգայանի նկարագրությունը. «...ի հարառոյ արևելից գեղջն կայ բերդ այդ, ի 15352 բարձու լեռնակի, աւանդի մեհենատեղի լինել ի հնումն: Յամին 1807 Կոտովիչ գորավար ռուսաց առ տիգնիսաւ եհար զբանակ Յուսուֆ փաշայի Կարնոյ մինչև հասեալ էր նմա օգնութիւն Ապպաս Միրզա արքայորդին Պարսից...»*

Խոնարհագոյն ևս յԵ. Հր Տիգնիսայ մերձ յանկիւն կցուածոյ երկոցուն գետոցն՝ Շիրակայ և Արփայի կա գիւղն ԱՐԱԼԸՂ/ թերևս ի պատճառս միջանկեալ դրիցն կոչեցեալ այսպէս. զօրմէ ասէ վերոհիշեալ հայրս «ի գիւղս այս ամրոց մի կայ քառակուսի, կողմանցն միայն կանգուն գոլով ցարդ, այլ ի ներքս չիք ինչ և է ի դաշտավայրի: Ի խանգարեալ արձանագրին ուրիշ վերածնի անունս ՀԱԶԱՐԱԲԵԿ, և թուական զայս ձև օրինակի

Ի ՇԺԵ Թ: Առընթեր դրան կայ վէմ մի մեծ և ի վերայ թուական ՈՂԷ... առաջին թուականն ընթեռնելի է ըստ իս ի ՇԺԵ թվ., որ է 1066 ամ ՓՐԿՉԻՆ, թէ չիցե ԶԺԷ 1266, զի նույն ամ /1269/ յիշատակի յարձանագրութիւնս Հոռոմոսի վանաց Հագարաբէկ ոմն որդի Թայիկի»:

*Տարածական առումով մեր պեղումները նույնքան հետազոտության վրա են Երագգավորս մայրաքաղաքից, որքան արևմտյան կողմում գտնվող Տիգնիս բերդը: Նշենք, որ բերդի հյուսիսային կողմում՝ հարթ տարածության վրա, գտնվում է Թիքնիս կամ Տիկնիս գյուղը: Արտաքին պարիսպները, ինչպես նաև հատակագիծը, խիստ նմանություն ունեն Անբերդի միջնաբերդ դղյակին, որի պարիսպն այս տեսքով վերաբերում է Չաքարյանների ժամանակին: Տիգնիս ամրոցը, ինչպես և Անի մայրաքաղաքը Բագրատունիների հզոր թագավորության կործանումից հետո՝ Չաքարյանների ժամանակ, վեր են ածվել գյուղաքաղաքների, այդ երևույթը համընդհանուր էր դարձել Բագրատունյաց թագավորության վերանալուց հետո: Այնպիսի խոշոր բնակավայրեր, ինչպիսիք Արտաշատն ու Արմավիրն էին, նույնպես վերածվեցին գյուղաքաղաքների: Բացառություն չի կազմել Երագգավորս բնակավայրը: Խոսքն այն մասին է, որ տարածքները մեծանում էին: Շատ դեպքերում երկու բնակավայր, որոնք Բագրատունիների օրոք մայրաքաղաք են եղել, Չաքարյանների օրոք՝ X–XIII դդ., վեր են ածվել մեկ ընդհանուր բնակավայրի, և որոնց պատմական աղբյուրների մեծ մասում գյուղաքաղաք կամ քաղաքագյուղ են անվանում:*

*Զիթհան: Պեղումների ժամանակ բացվել են ձիթհան, ձիթհանի քարը, ինչպես և բովելու տեղը: Մեր բացած ձիթհանը Չաքարյանների շրջանին է պատկանում: Անբերդի 1026 թվակիր արձանագրության մեջ հիշատակվում է կտավատի մասին, ինչը փաստում է, որ Բագրատունյաց ժամանակներում Արագածոտնի, ինչպես և Շիրակի շրջաններում լայնորեն տարածված էր կտավատի մշակումը: Մեզ հայտնի չէ, թե X–XI դդ., երբ Երագգավորսի կաթողիկե եկեղեցին դարձավ ամրոց և մտավ Բագրատունյաց թագավորության պաշտպանական համակարգի մեջ, մեր պեղած*

բնակավայրն ինչպե՞ս էր կոչվում և, մանավանդ, կառուցողական ինչպիսի՞ սկզբունքներ ուներ:

Երազգավորսից ընդամենը մի քանի կիլոմետր հարավ՝ Լուսադբյուր գյուղում, մինչ վերջերս պահպանվել էր XVIII–XIX դդ. կառուցված ձիթհանի շենքը: Նշելի է նաև, որ Շիրակի դաշտի գյուղերում անցյալ դարի վերջերին գրեթե ամեն տեղ կային ձիթհաններ: Դրանք մեծ մասամբ բնակավայրից դուրս էին գտնվում: Նախորդ հասարակարգի, տնտեսակարգի պայմաններում, պարտադրված այս կամ այն գյուղատնտեսական կուլտուրայի մշակման արդյունքում, կտավատի արտադրությունը թեև նվազեցվել, բայց լրիվ չի ընդհատվել: Ծովի մակերևույթից 1600–1700 մ բարձրության վրա գտնվող բնակավայրում շարունակել են կտավատ մշակել: Ձիթատու այլ բույսերի մշակման (քունջութ և այլն) մասին մեզ ոչինչ հայտնի չէ:

Նշենք նաև, որ Կափուլի-Գուսանագյուղ բնակավայրի տարածքում մեր ուսումնասիրությունների ժամանակ հարավային Շահ-թաղթ կոչված վայրում ամբողջական քարերի կամ ավելի ճիշտ տուֆ քարերի մեջ պեղեցինք հորեր, որոնք ունեին միջնադարյան կարասների տեսք: Չենք բացառում, որ դրանք վերաբերում են նախնադարին: Հասկանալի է, որ յուրաքանչյուր անոթ, մեծ մասամբ անկախ ժամանակից, պետք է պատրաստվի այնպես, որ ծառայի նպատակին: Այլ խնդիր է, որ ժամանակի մտածելակերպի ու ճաշակի արդյունք է այս կամ այն ձևը՝ արտահայտված ուռուցիկ կամ ավելի շեշտված փոր ունեցող կարասների տեսքով: Մեր պեղածների պարագայում դրանք մի քանի հարյուր լիտր տարողություն ունեցող փորվածքներ էին, որոնց մեջ չհայտնաբերվեց որևէ հատիկ ցորեն կամ գարի: Նախապես կարծում էինք, թե գործ ունենք «...Թե ձեր Շարայի որկորք... մեր ամբարք չեն» արտահայտության հետ կապված շտեմարանների հետ: Դեռևս Գուսանագյուղի Շահ-թաղթ կոչվող վայրի ուսումնասիրություններն այն մակարդակի չեն, որ կարասներ կոչվածները կարողանանք վերագրել այս կամ այն ժամանակին: Գուսանագյուղի կենտրոնում է գտնվում X դ. կառուցված ամրոցը, որը XII–XIII դդ. նույնպես գյուղաքաղաք է եղել:

Երազգավորս - Արալըղ պեղումների, Երազգավորս - Շիրակական մայրաքաղաքի, Տիգնիս ամրոցի տեղագրական ուսումնասիրության արդյունքում ստացվում է պաշտամունքային, պաշտպանական, տնտեսական համակարգերի մասին հստակ պատկեր: Պեղումների արդյունքները արաբական արշավանքների, դրանց ծանր հետևանքների, Բագրատունյաց թագավորների ամրոցաշինական գործողությունների, ամբողջ հայ ժողովրդի համառ պայքարի վառ արտահայտությունն են: